

每週經課朗誦經文(巴克禮漢羅/教羅)2013/09/08

共同經課 - 1 耶利米書十八章一節~十一節

1 耶和華 ê 話臨到耶利米講，2 你起來，落去燒磁人 ê 厝；我 tī-hia beh hō你聽我 ê 話。3 我就落去燒磁人 ê 厝；tú-tng 伊用輪(lùn)teh tng，做伊 ê 工。4 燒磁人用土做 ê 器具，tī 伊 ê 手若 pháíⁿ 去，伊就用 hit 塊土另外做別號 ê 器具；照燒磁人所看做好 ê 來做伊。5 耶和華 ê 話就臨到我講，6 耶和華講，以色列家 ah，我款待 lín kiám boē 能親像 chit-ê 燒磁人 ê 所做 mah？以色列家 ah，土 tī 燒磁人 ê 手中怎樣，lín tī 我 ê 手中亦是 án-ni。7 我甚麼時論到一族 á 是一國講，我 beh kā 伊拔起來，kā 伊拆毀，kā 伊毀壞；8 我所講 ê hit 一族，若反悔離開伊 ê pháíⁿ，我就 beh 退悔所想 beh 降 hō in ê 災厄。9 我甚麼時論到一族 á 是一國，講 beh 建立，beh 栽種；10 in 若行我看做 pháíⁿ ê 事，m̄聽 thàn 我 ê 話，我就 beh 退悔我所講 beh hō in ê 福氣。11 Taⁿ 你 tiòh kā 猶大人 kap khiā 起耶路撒冷 ê 百姓講，耶和華 án-ni 講，我備辦災厄攻擊 lín，亦設計謀攻擊 lín；lín tàk 人 tiòh oát 頭，離開伊 ê pháíⁿ 路，改正 lín ê 所行 lín ê 所做。

共同經課 - 2 詩篇一百三十九篇一節~六節，十三節~十八節

1 大衛 ê 詩，交 hō 樂官。1) 耶和華 ah，你已經鑑察我，bat 我。2 我坐落去，我 peh 起來，你 lóng 知；你 tùi 遠遠知我 ê 念頭。3 我行路，我倒 tī 眠床，你 lóng 詳細知；我一切所行 ê，你也深知。4 耶和華 ah，我 ê 嘴所講 ê 話，你無一句 m̄知。5 你 tī 我 ê 前後圍我，接手 tī 我 ê 頂面。6 Chit 款 ê 知識奇妙，我 boē 能測度；真高，我 boē 能到。13 因為我 ê 臟腑，是你所創造 ê；我 tī 老母 ê 腹肚內，你有庇佑我。14 我 beh 感謝你，因為我受造奇妙 thang 驚；你 ê 所做奇妙；這是我 ê 心深知 ê。15 我 tī 暗中受造，Tī 地 ê 真底受連絡，Hit 時我 ê 形體無隱瞞 tī 你。16 我 bē 成形 ê 體質，你 ê 目矚已經看見，所定 tiòh ê 日，iáu 未有一日，Lóng 記 tī 你 ê 冊。17 上帝 ah，你 ê 意思對 tī 我，到 chiah 寶貝！Hit-ê 數額，到 chiah choē！18 我若 beh 算伊，妣海沙 khah-choē；我困精神 ê 時，猶原 kap 你相 kap tī-teh。

共同經課 - 3 腓利門書一節~二十一節

1 做基督耶穌 ê 囚犯，保羅，kap 兄弟提摩太，phoe 寄 hō 阮所疼同 tiòh 磨 ê 腓利門，2 kap 姊妹 A-hui-a，以及 kap 我同當兵 e5A-ki-pò，kap 聚集 tī 你 ê 家 ê 教會；3 願 lín 對咱 ê 父上帝 kap 主耶穌基督得 tiòh 恩典平安。4 我常常感謝我 ê 上帝，tī 我祈禱 ê 中間 siàu 念你；5 因為聽見你 ê 仁愛 kap 你所有 ê 信，就是 òng 主耶穌 kap 顯出 tī 眾聖徒 ê；6 願你 ê 信 ê 相通有功效，thang 深知 lín 中間萬項 ê 好，來歸 tī 基督。7 兄弟 ah，我為 tiòh 你 ê 仁愛大歡喜，大安慰；因為聖徒 ê 心對你得 tiòh 安歇。8 所以我雖然 tī 基督有 thang 好膽將所合宜行 ê 吩咐你，9 獨獨因為相疼 ê 緣故，寧可求你；我就是年老 ê 保羅，現今也為 tiòh 基督耶穌來受關監。10 我為 tiòh 我 ê kiáⁿ，就是我 tī 掛鐵鍊 ê 時所生 ê，O-nî-se-bó，來求你；11 伊前無利益你，現今就做你我 ê 利益；12 我有差伊 koh tò 去你 hia；chit 人就是我 ê 心腹。13 我本 ài 留伊 kap 我 toà，thang tī 我為 tiòh 福音掛鐵鍊 ê 時，替你服事我。14 總是未知你 ê 意思，我就 m̄-ài 做甚麼；是 beh hō 你 ê 好，m̄ 是出 tī 勉強，是出 tī 甘願。15 因為伊暫時離開你，kiám-chhái 是 beh hō 你 thang 永遠得 tiòh 伊；16 m̄ 是猶原做奴僕，是贏過奴僕，就是做所疼 ê 兄弟；我實在看伊做 án-ni；何況伊是你家內 ê 人，koh 是屬 tī 主 ê，kiám 無 koh-khah 疼伊 mah？17 所以你若掠我做同伴，tiòh 接納伊，親像接納我。18 伊若有刻虧你，á 是欠你甚麼，thang 算我 ê 賬。19 我保羅親手寫，我 beh 坐額；免我 kā 你講，你所欠我 ê，是你本身 ê 性命。20 是 lah，兄弟 ah，hō 我 tī 主對你得 tiòh 歡喜；hō 我 ê 心 tī 基督得 tiòh 安歇。21 我已經深信你 ê 順 thàn，就寫 phoe hō 你，因為知你所 beh 行 ê，會過頭 tī 我所講 ê。

共同經課 - 4 路加福音十四章二十五節~三十三節

25 Choē-choē 人 kap 伊同行，伊就 oát 過來，對 in 講，26 若有人就近我，也無怨恨伊 ê 父母、bó-kiáⁿ、兄弟、姊妹，以及家己 ê 性命，就 boē 能做我 ê 學生。27 無 giá 家己 ê 十字架來 tè 我 ê，也 boē 能做我 ê 學生。28 Lín 中間甚麼人 beh 起塔，kiám 無事先坐 teh，來算 hit-ê 所費，看能起到成 boē？29 驚了 kiám-chhái hē 地基，也 boē 能起到好；就看見 ê 人 lóng 恥笑伊，講，30 Chit-ê 人有動工，也 boē 起到好。31 á 是甚麼王出來 beh kap 別個王交戰，kiám 無事先坐 teh 參謀；看能用一萬兵抵敵 hit-ê choā 兩萬兵來攻擊伊 ê，á boē？32 若 boē，就趁伊 iáu 遠，差使者去 kap 伊講和。33 Án-ni，lín 中間見若無放 sak 一切所有 ê，boē 能做我 ê 學生。